

.../business proizvodnja



Nova postrojenja Messera u Zenici



Vrpcu presjekli vlasnik Messera i ministar Hećo



Investicija MESSERA vrijedna 20 miliona eura

Njemačka Messer Grupa u krugu tehnološke zone ArcelorMittala u Zenici izgradila prvu fabriku za proizvodnju industrijskih gasova - azota, kisika i argona. U novim postrojenjima posao je dobilo 25 ljudi, a sa ovim pogonom BiH od neto uvoznika, postaje neto izvoznik industrijskih gasova.

Za *Business magazine*
piše *Adem Mecavica*

Zahvaljujući jednom od vodećih svjetskih proizvođača industrijskih gasova, njemačkoj Messer Grupi, Bosna i Hercegovina dobila je prvu fabriku za proizvodnju industrijskih gasova - azota, kisika i argona. Fabrika je sagrađena u krugu tehnološke zone Arce-

lorMittala u Zenici, a u izgradnju postrojenja investirano je 20 miliona eura. Messerova nova razlagaona zraka identična je brojnim fabrikama koje je ova grupa sagradila u posljednje četiri godine širom Evrope, te Kini i Vijetnamu, primjenjujući najnovija naučno - tehnološka

dostignuća u ovoj oblasti.

Ugovor o opskrbljivanju tehnološkog procesa industrijskim gasovima ArcelorMittal Zenica i Messer Grupa potpisali su još 2005. godine, a dvije godine kasnije potpisan je ugovor o izgradnji nove razlagaone zrake. Početkom 2008. godine u rad je pu-

šteno netom remontirano staro postrojenje, a desetak mjeseci kasnije proizvodnja je pokrenuta i na novoj opremi, dopremljenoj iz daleke Kine.

U augustu ove godine instaliran je novi zračni kompresor, srce ovog postrojenja, koje zrak razlaže na osnovne komponente - kisik, argon i azot, od čega se kao krajnji proizvod dobija gasoviti kisik, tečni kisik i tečni argon.

Najsavremeniji uređaji

U novoj fabrici posao je dobilo 25 ljudi, uglavnom mladih inženjera, a većini je ovaj posao prvo zaposlenje nakon završetka studija. U narednom periodu planira se završetak kompletne investicije, stabiliziranje procesa proizvodnje, održavanje izuzetno dobrog kvaliteta proizvoda, uz neprestanu kontrolu kvaliteta najsavremenijim uređajima.

Uz grandioznu svečanost i vatromet, fabricu su u rad pustili Stefan Messer, predsjednik Messer Grupe i Vahid Hećo, federalni ministar za energiju, rudarstvo i industriju. Pozdravljajući brojne zvaničnike, među kojima je bio i njemački ambasador u našoj zemlji Joachim Schmidt, gost iz Frankfurta podsjetio je da je Messer u BiH prisutan od 1997. godine, te da je ta kompanija bila među prvim inozemnim preduzećima koja su odlučila ujediniti svoju modernu tehnologiju i infrastrukturu sa domaćom pameti i ljudskim resursima.

“Takva politika kompanije pokazala se ispravnom i zato smo ovdje gdje jesmo - u Zenici, gradu koji nam je bezuslovno ponudio svoje gostoprimstvo i resurse na raspolaganje, a koji su nam bili neophodni da bismo realizirali svoj cilj. Za kompaniju Messer tržište BiH izuzetno je značajno zbog očevitih predispozicija koje ima u pogledu razvoja industrijskih kapaciteta. Stoga ovdje vidimo mogućnost snabdijevanja raznih potrošača kojima su ovi gasovi neophodni u proizvodnom procesu, ali i priliku da ih izvozimo u susjedne zemlje”, kazao je Messer u svom prvom obraćanju bh. javnosti, otkad je preu-

Dolazi razdoblje oporavka

Iako se ekonomisti još ne mogu složiti da li treba proglasiti kraj globalne ekonomske krize, Stefan Messer bez dvojbe tvrdi kako je kriza dosegla svoje dno i da dolazi razdoblje oporavka tržišta. Stoga će jedan od vodećih svjetskih proizvođača industrijskih gasova, sa godišnjim prometom od oko 1,5 milijardi KM, fokusirati snagu na razvoj proizvodnje i plasmana gasova u BiH, a u zavisnosti od potražnje nastaviti širenje u regiji.



U narednom periodu planira se završetak kompletne investicije, stabiliziranje procesa proizvodnje, održavanje izuzetno dobrog kvaliteta proizvoda, uz neprestanu kontrolu kvaliteta najsavremenijim uređajima

zeo vođenje Messer Grupe prije pet godina. Ernst Bode, direktor Messer Tehnogasa Beograd i regionalni direktor za jugoistočnu Evropu, posebno je istaknuo značaj ove investicije za jačanje bh. privrede i izvoza, podsjetivši da je BiH donedavno bila neto uvoznik, a otvaranjem nove fabrike postala je neto izvoznik tehničkih gasova. Industrijski gasovi iz Zenice već su pronašli svoje kupce u Mađarskoj, Hrvatskoj i Austriji.

“Messer će i dalje nastojati da svojom investicionom strategijom jača poziciju na ovom tržištu. Naš cilj je da u BiH budemo lider u opskrbljivanju tehničkim gasovima putem jako niskih cijena i visokog kvaliteta, te damo svoj doprinos industrijskom razvoju BiH”, kazao je Bode.

Čista tehnologija

Valentin Ilievski, generalni menadžer Messer BH Gasa Sarajevo, kompanije koju čine Messer Sarajevo Plin i Messer Mostar Plin, sa četiri distributivna centra i tri punionice, a sada i fabrikom, ukazao je na višestruki značaj ovog projekta, finansiranog isključivo sredstvima Messera. Prvo i najvažnije, kako je rekao, jeste da je tehnologija čista i da nema nikakvih štetnih uticaja na okoliš, zatim da su otvorena nova radna mjesta, te da su stvorene predispozicije za otvaranje novih kompanija u BiH i da će, na nivou države, ulaganje donijeti značajan priliv deviznih sredstava.

Ni domaći zvaničnici nisu krili zadovoljstvo zbog okončanja Messerove investicije. Federalni ministar Hećo istaknuo je kako su tehnički gasovi sada lakše dostupni za

domaće kompanije, a da će to posebno doći do izražaja u predstojećim investicijskim projektima u oblasti energetike, te modernizacije rudnika.

Zenički načelnik Husejin Smajlović kazao je kako je ovo ulaganje još jedna potvrda pozitivnog ambijenta za ulaganje, izrazivši nadu da će i druge kompanije slijediti primjer njemačke grupacije.

Messerova politika ulaganja u širenje kapaciteta i nova tržišta, te proizvodnju i edukaciju zaposlenih, što je u suprotnosti sa logikom neophodne štednje u preduzećima u vrijeme krize, upravo je najčešće pitanje na koje novinari odgovor traže od Stefana Messera, unuka Adolfa Messera, koji je daleke 1898. godine osnovao kompaniju u Frankfurtu na Majni. On odgovara da je gasna industrija danas, i pored svake regionalnosti, možda i najglobalnija upravo iz razloga što preduzeća iz svih dijelova svijeta gas trebaju isto kao i vodu i struju i što se, bez obzira na finansijsku krizu, poslovi planiraju nekoliko godina unaprijed.

“Mi u Messeru ćemo i dalje nastaviti našu strategiju investiranja u proširenje naših proizvodnih kapaciteta, kako bismo naše klijente snabdijevali sigurno i nezavisno. U skladu sa tom strategijom, ove godine u investicije smo plasirali oko 200 miliona eura, što je otprilike četvrtina našeg prometa, u izgradnju novih postrojenja u Evropi i Aziji. Jedna desetina takvog ulaganja stigla je ovdje u BiH i siguran sam da će biti dobra i za vas i za nas. Samo bliska kooperacija može donijeti najbolje rezultate i optimizirati procese razvoja”, kaže Messer. **B**